

REGIONAL NEWS

HEADLINES:-

1. Governor Dr Hari Babu Kambhampati an Sairang leh Vairengte inkar kawngpui pawimawh a rang lama siam thei turin Department pahnih te inkara chinfel thuai a tul a ti.
2. Union Minister of State for Agriculture and Farmers Welfare Pu Bhagirath Choudhary chuan Selesih a College of Veterinary Sciences & Animal Husbandry a tlawh .
3. Supreme Court judge atana ruat thar Justice Nongmeikapam Kotiswar Singh leh Justice R. Mahadevan te chu vawiin khan rinawmna thu tiam tira lakluh an ni
4. Supreme Court chuan vawiin khan NEET UG exam paper putru thubuai a ngaihtuah tan.

<><><>

GOVERNOR

Governor Dr Hari Babu Kambhampati an Sairang leh Vairengte inkar kawngpui pawimawh a rang lama siam thei turin Department pahnih te inkara chinfel tur awm te, chin fel tumin theihtawp chhuah a ngai a ni a ti.

Vawiin khan Governor hian Raj Bhavan-ah NHIDCL- Regional Office Aizawl hotute chu meeting a neih pui a. He hunah hian NHIDCL ten Mizoram chhunga National Highway siam hna hmun 8 a an neih chungchang an sawifiah a, NHIDCL hotute hian kawngpui pawimawh tak Vairengte - Sairang leh hmun danga hna thawh theih a nih loh chhan te an sawifiah a.

NHIDCL hotuten kawngsiam hna hmun thenkhatah mimal hmalakna leh dodalna avanga a khaihlak thin thu an sawi a. An harsatna lian ber erawh kawng laihna tur ruahman chungchangah sawrkar department pahnih inremsiam theih loh vang a ni an ti.

Hemi chungchangah Governor Dr Hari Babu Kambhampati chuan NHIDCL hnathawk te chu beidawng mai lovin, Mizoram tana hmasawna ruhrel pawimawh hmasa bera chhal theih, NH kawngpui laih zau leh NH Kawngpui siam hna thawh a nih theih nan, an harsatna tawh chu chinfel dan zawng chhonzawm zel turin a chah a. Hmalak chhonzawm dan tur pawh sawipui nghalin, amah pawhin Ministry lamah a theih dana umzui a tum thu a sawi.

Governor chuan NH Kawngpui pawimawh zingah Mizoram tana Nunna Hnar tia chhal theih Vairengte - Sairang kawngpui 4 lane a siam hna a thawh theih loh tawp chu pawh a tih zia a sawi a. He kawngpui hi a tlang rual rualin Mizoramah nitina an khawsakna atan sum senso nasa takin a tlem phah dawn a, bungraw lei man nasa takin a tlem phah bakah Mizoramah hmasawna kawng hrang hrangin a thlen thei dawn a ni a ti. Chuvangin, hetiang khawpa Kawngpui pawimawh hi a rang lama thawh theih a pawimawh a, Department pahnih te pawh an inkara chinfel tur awm te, chin fel tumin theihtawp an chhuah a ngai a ni a ti.

<><><>

CM

Chief Minister Pu Lalduhoma hovin CM Conference Hall ah karleh a New Delhi a neih tur NITI Aayog Governing Council atana inbuatsaihna meeting neih a ni a.

Pu Lalmalsawma Pachuau, Secretary Planning & Programme Implementation chuan NITI Aayog Governing Council hnuhnung berin a rel, Mizoram sawrkarin a bawhzui ngai te a bawhzui dan sawifiahin Council lo awm tura inpuahchahna an neih dan a sawi a, line department ten an hmalakna an sawifiah bawk.

NITI Aayog hi Union Cabinet in kum 2015 a a din a ni a. Prime Minister chu Chairman niin state leh UT zawng zawng Chief Minister te chu member an ni. NITI Aayog bultum hian Viksit Bharat 2047 kalpui mek a ni a. Kum 2047 hmaa India ram chu ram changkang (developed country) a hlankai tumna a ni.

<><><>

AH& VETY

Union Minister of State for Agriculture and Farmers Welfare Pu Bhagirath Choudhary chuan College of Veterinary Sciences & Animal Husbandry (CVSc& AH), Central Agricultural University (CAU), Selesih-a Teaching Veterinary Clinical Complex leh Department of Veterinary Microbiology a tlawh a. College-in an sak thar Sales Booth leh Silver Jubilee Monument-te a hawng a, College Community Hall-a exhibition buatsaih a tlawh bakah loneitute leh ran vulhtute nen inkawmhona hun an hmang bawk.

Union Minister of State hian Vety. College-in kum 25 an tlin hriatreng nana lung an phun silver jubilee monument a hawng bawk a. College campus-ah thing a phun hnuah Community Hall-a Exhibition buatsaih chu tlawhin a enfiah a, he hmunah hian Prof. Lalnuntluangi Hmar, Dean, College of Veterinary Sciences & Animal Husbandry kaihhruaiin loneitute leh ran vulhtute nen inkawmhona hun hlawkthlak tak neih chhonzawm a ni.

Pu Bhagirath Choudhary chuan loneitute leh ran vulhtute chu ngaih pawimawh tur an nih thu leh kum 2029 ah chuan an thla tin lak luh hi a let 4-a pung tura hmalakna kalpui mek a nih thu a sawi a. An thlai leh sa tharchhuahte a hralhna lam kan ngaipawimawh tur a ni a, FPO hi thu mai ni lovin atakin kan kalpui tur a ni, a ti bawk.

Union Minister of State for Agriculture & Farmers Welfare Pu Bhagirath Choudhary hian nimin chawhnu khan Mizoram lo thlengin Lengpui Airport-ah Agriculture & Farmers Welfare Minister Pu PC Vanlalruata, Agriculture Secretary Pi Ramdiniani leh sawrkar official pawimawh dangte'n an lo dawngsawng a. Ruahman dan chuan program pawimawh hrang hrangte a hman zawh fel hnuah naktuk chawhnu hian New Delhi-ah a kir leh dawn a ni.

<><><>

PAC

Comptroller & Auditor General of India (CAG) in sorkar department hrang hrang sum hman dan a endikna chungchangah hriatfiah duh an neih te bawhzuiin Mizoram Legislative Assembly hnuaiia Public Account Committee (PAC) member te chuan vawiin khan an Kolasib an tlawh a. PAC member te hi an Chairman Pu Lalchhandama Ralte, Leader of Opposition chuan ho in, Kolasib District Court Conference Hall-ah Audit note hi mi pawimawh te nen an enho a. Pu Lalchhandama Ralte chuan, sum hman danah thil diklo a awm em, tih hriat an duh thu a sawi a, an thil hmuh leh hriatte chu Assembly ah chhawp chhuah leh a ni dawn tih a sawi.

Kolasib tlawhtu PAC member te hi Pu VL Zaithanzama; Dr K Beichhua; Pu C. Ngunlianchungah leh Col. Clement Lalhmingthanga te anni a, member dang- Pu W Chhuanawm leh Pu TBC Lalvenchhunga te chu rokhawlhna avangin an tel theilo a ni.

PAC member te hi Kolasib Bawrsap Pu Robert C. Lalhmangaiha hovin, SP Pu David H Lalthangliana; Fast Track Court Judge Pu R. Vanlalena leh sorkar mi pawimawh dangten Circuit House-ah an lo dawngsawng a, District Court Conference Hall-ah inkawmna hun an hman hnuah Room thenkhat te tlawhin bungraw lei te an enfiah nghal a, hemi hnu hian Mamit panin an chhuak leh nghal a ni.

<><><>

WORKING COMT ON LENGPUI

Lengpui Airport kalpui zel dan tur ngaihtuahtu 'Working Committee' chuan Lengpui Airport-ah Chairman Pu TBC Lalvenchhunga, Adviser to Chief Minister (Finance & Planning) hovin hmun pawimawh te an fang kual a, hmalak zel dan tur an sawi ho bawk.

Working Committee hian July 31ral hmain Sorkar ah Lengpui Airport kal zel dan tur rawtna an theh lut ang. Chairman hian a hmunah Lengpui Airport hna kal lai mek te a en dik nghal bawk.

<><><>

CHAWNGTE JT NGO

NGO pakua telna Joint NGO Chawngte chuan Lawngtlai Press Club ah thuthar thehdarhtute kawmin Mizoram Sorkar a Minister pathum te hnena an mamawhzual tak tak chauh ngaihpawimawhsak tura an ngenna in awmzia a nei loh avangin an lungawilo hle tih an sawi.

Chanchinbumite an kawmna ah May thla ni 8 & 9 khan Aizawl ah kalin Jt.NGO hruaituten PWD, Health leh Home Minister te hmuin mamawh tamtak an neih zingah an mamawhzual tak tak chauh ngaihpaiwmawhsak tura an ngenna chuan vawiin thlengin ngaihsak a hlawhlo chu hriatthiam har an ti a, inggaihsaklohna leh inthliarna ang hiala an ngaihthu an sawi a, an ngenna chungchangah August 13 thleng sorkar ngaihchan an tum thu leh hemi hnu ah a tul chuan na zawka Sorkar nawr an tumthu an sawi.

Jt NGO hruaitute chuan Chawngte khawchhung bikah ringawt pawh mihring 13,448 awmin, Police indaihlohna a lian hle niin an sawi a, tun dinhmunah Chawngte Police Station ah awmtheitur a tih mi 24 ah mi 6 chauh an awm a, Constable phei chu pakhat chiah a awm niin an sawi a, Home Minister hnena an ngenna chuan awmzia a la neilo niin an sawi.

Community Health Centre hnuai ah mihring 24,939 awmin hmanrua chi hrang hrang ah a tlabalin thawktu an indaihloh hle tih an sawi a, thildang engemawzat zingah Doctor pakhat tal dahbelh tura an ngenna chuan ngaihven a hlawh lovin, June 6, 2024 a Doctor 35 lak thar zingah Chawngte ah dahtur ruahman a nivelo chu hriatthiam har an tih thu an sawi a, CHC Chawngte ah thawktu awmtheitur a ngaih mi 46 a nihlaiin tun dinhmun ah mi 22 chauh an awm thu an sawi baw.

SASCI hnuai ah Chawngte khawchhung kawngpui siamthat tura tih chu hna chu mumal taka thawh a awmlo niin Jt NGO Chawngte hruaitute chuan an sawi a, tunthla Ni 22 hi he hna zawhfel huntur a tih anih laiin WBM takngial pawh phah zawh a la nilova, an phahsa pawh ruahsur vang leh hmanrua thalo hman vangin a chhe deuh vek niin an sawi baw.

Tun dinhmun ah Chawngte leh Diltlang South inkar leh Chawngte leh Lunglei inkar chu lirthei tan kal harsa khawpin a chhia tih Jt.NGO Chawngte hruaitute chuan an sawi tel baw.

<><><>

DDK

Doordarshan Kendra Aizawl buatsaih Mizoram Indigenous Games, Champhaia neih chu vawiin chawhnu khan khar a ni.

Kharna inkhawm DDK Aizawl Producer Pu T.Siama kaihhruai hian Champhai RD Block BDO Pi K.Lalhruaitluangin thusawiin, Champhaia tun hnaiah hetiang infiamna an buatsaih tawh ngai loh hnuah thar thawh a ni leh chu thil lawmawm tak a ni, a ti a. Mizo infiamna te chawi nung zel turin thalaiten mahni taksa enkawl that kawngah mawhphurhna an nei a. Ruihhlo laka filhim a pawimawh takzet tih a sawi a ni.

Tun tum Champhaia Mizoram Indigenous Games ah hian YMA branch 17 atangin infiammi 328 an tel thei a, district 7 a neih tawh chinah tel an tam ber tum a ni. Infiamna hrang hrang: insuknawr, insaihrui pawh, inarpathai, inkawibah leh inbuan ah te inelna neiin a titha pakhatna atanga pathumna te chuan November thlaa Mizoram puma inelna neih turah Champhai district ai an awh leh dawn a ni.

<><><>

SC JUDGES

Supreme Court judge atana ruat thar Justice Nongmeikapam Kotiswar Singh leh Justice R. Mahadevan te chu vawiin khan rinawmna thu tiam tira lakluh an ni. Chief Justice of India Justice DY Chandrachud chuan Judge thar pahnihte hi rinawmna thu a tiam tir a. SUPreme COurt a judge atana ruat an nih hma hian Justice Nongmeikapam Kotiswar hi Jammu and Kashmir and Ladakh Chief Justice a ni a, Justice R. Mahadevan hi Madars High Court judge a ni baw.

<><><>

NEET UG

Supreme Court chuan vawiin khan NEET UG exam paper putru thubuai a ngaihtuah tan a. NEET exam neih that leh tumna chuan inngahchhan bulfuk tak a neih a tul thu sawiin exam pumpui zahawmna a nghawng dawn a ni a ti. Cheif Justice of India DY Chandrachuda kaihhruai bench chuan NEET UG exam a dan kalha thiltih awm khinna 40 chuang lut chu vawiin khan a ngaihtuah a ni.

<><><>

INDIA ON GAZA

India chuan Gaza-a inkahhai leh mi tangte chhuah zalen chu a duh ber anih thu United Nations ah a sawi nawn. United Nations Security Council (UNSC) Open Deabte on West Asia ah he thu hi sawiin UN a India Palai R. Ravindra chuan Palestine tan puihna a thawn reng thu sawiin US dollar maktaduai 120 chuang a pe tawh a ni a ti.

Hetihlai hian UNSC ah hian US envoy Linda Thomas Greenfield chuan Gaza-a inkahhai puang tur hian inbiak mek anih thu a sawi a. UNRWA chief Phillipe Lazzarini chuan Gaza indonaah hian dan zawng zawng palzut vek a ni a ti a. NI 10 kalta chhung khan Palestinian raltlan te dahna sikul 8 Israel in an bei tih a tarlang bawh a ni.

<><><>